

Kirkjuþing 2021-2022

54. mál – þskj. 86

## T I L L A G A

### **til þingsályktunar um stefnumótun kærleiksþjónustu þjóðkirkjunnar.**

(Lagt fyrir 62. kirkjuþing 2021-2022).

Flutt af biskupi Íslands.

Frsm. Agnes M. Sigurðardóttir.

Kirkjuþing 2021-2022 samþykkir eftirfarandi stefnumótun kærleiksþjónustu þjóðkirkjunnar og felur biskupi Íslands að hrinda henni í framkvæmd.

### **Stefnumótun kærleiksþjónustu þjóðkirkjunnar.**

#### **Inngangur**

Kirkjuþing 2018 (11. mál) samþykkti að fela kirkjuráði að skipa nefnd til að vinna að stefnumótun fyrir kærleiksþjónustu þjóðkirkjunnar. Nefndin var formlega skipuð þann 9. október 2019, en í henni eru Elísabet Gísladóttir, djákni, tilnefnd af Djáknafélagi Íslands, sr. Þór Hauksson, sóknarprestur, tilnefndur af Prestafélagi Íslands og Ragnheiður Sverrisdóttir, djákni og verkefnastjóri á kærleiksþjónustusviði biskupsstofu. Ragnheiður er formaður nefndarinnar.

Nefndin hafði samráð við presta, djákna og leikmenn / starfsmenn sókna og átti samtöl við hlutaðeigandi fulltrúa sérhæfðrar kærleiksþjónustu kirkjunnar, og byggir stefnuna á þeim megináherslum sem fram komu í þeirri vinnu.

Áfangaskýrsla með helstu niðurstöður nefndarinnar var kynnt fyrir kirkjuþingsfulltrúm á Kirkjuþingi í október 2021. Í framhaldinu fól biskup Íslands nefndinni að útbúa stefnuskjal fyrir kærleiksþjónustu Þjóðkirkjunnar, sem lagt yrði fyrir Kirkjuþing í mars 2022.

# I. KAFLI

## Kærleikþjónusta þjóðkirkjunnar

### 1. Tilgangur

Kærleikþjónusta er órofa hluti af því köllunarhlutverki sem þjóðkirkjan vill rækja og er nauðsynleg til að hún nái markmiðum sínum. Þjónustan felst í því að sýna trú í verki. Hún leitast við að mæta fólki í fjölbreyttum aðstæðum. Í henni felst viðleitni til að styðja það og vera í samfylgd með þeim sem glíma við erfiðar andlegar, líkamlegar og félagslegar aðstæður. Hún felur í sér umhyggju fyrir allri sköpuninni.

Þjóðkirkjunni er skylt að styðja við náungann og sinna kærleikþjónustu, enda er það eitt megin hlutverk hennar. Kirkjan leggur krafta sína fram þar sem hún telur þörfina mesta. Þá sinnir starfsfólk kirkjunnar faglegri þjónustu sem greinir þörf, skipuleggur og sér til þess að hún sé innt af hendi. Samstarf er jafnframt mikilvægt við alla sem vilja vinna að góðum málefnum.

### 2. Hlutverk

- Kærleikþjónusta þjóðkirkjunnar veitir öllum þjónustu óháð kynferði, trúarbrögðum, skoðunum, þjóðerni, kynþætti, efnahag eða ætterni.
- Kærleikþjónusta þjóðkirkjunnar mætir þörfum fólks með þjónustu sinni og sálgæslu. Hún valdeflir, rýfur einangrun og einmanaleika og vekur von í brjósti með stuðningi sínum.
- Kærleikþjónusta þjóðkirkjunnar beinir þjónustu sinni að fólki sem er í vanda og þarf á aðstoð að halda.
- Kærleikþjónusta þjóðkirkjunnar leitar uppi þau sem eru hjálparþurfi og veitir þeim þjónustu og samfylgd við hæfi.

### 3. Leiðarljós

Til að auðvelda þeim, sem veita kærleikþjónustu á vettvangi kirkjunnar, að rækja hlutverk sitt er gott að styðjast við ákveðin leiðarljós. Auk trúar, vonar og kærleika eru þau meðal annars:

#### Traust

- felst í trúnaði, tryggð og áreiðanleika þess sem veitir þjónustuna.
- leiðir til tiltrúar hjá þeim sem hana þiggur.

- Er grundvöllur í öllum góðum samskiptum ekki síst í erfiðum málum.

### **Samhygð**

- er samkennd, samlíðan og hluttekning sem sýnd er af virðingu.
- felst í að geta sett sig í spor annarra og skilið þau.
- felst í að bregðast við á uppbyggilegan hátt.

### **Hlustun**

- felst í að vera til staðar, sýna skilning og hlusta á virkan hátt
- felst í að lesa í hreyfingar og svipbrigði en ekki aðeins orðunum sem eru sögð
- felst í að skilja og leiðbeina en sýna að hlustað er.

### **Jákvæður mannskilningur**

- felst í að öll séum við sköpun Guðs og börn Guðs.
- felst í að öll skulum við vera jöfn og njóta mannréttinda án tillits til kynferðis, trúarbragða, skoðana, þjóðernisuppruna, kynþáttar, litarháttar, efnahags, ætternis og stöðu að öðru leyti.

### **Samstarf**

- felst í vinnu á breiðari grundvelli en í einni sókn.
- felst í teymisvinnu bæði innan og utan kirkjunnar.
- felst í samstarfi við stofnanir ríkis og sveitafélaga sem og við önnur kristin trúfélög og félagsamtök sem láta sér annt um manneskjuna.

## **II. KAFLI**

### **Markmið og framkvæmd**

Markmið kærleikþjónustunnar er að mæta sérhverjum einstaklingi af kærleika og virðingu og veita stuðning til sjálfshjálpar. Til þess að svo megi verða er nauðsynlegt að styrkja kirkjuna í þjónustunni með því að greina þörfina og koma með tillögur að skipulagi og framkvæmd þjónustunnar á hverjum stað.

Lagt er til að horft verði til fjögurra sviða þar sem kærleikþjónusta er unnin og tekið verði tillit til aðstæðna og hvernig eflingu þjónustunnar er best fyrir komið á hverju sviði, þ.e. í

- starfi í prófastsdæmum, samstarfssvæðum og eða sóknum

- starfi sérþjónustunnar
- starfi stofnana kirkjunnar
- starfi að sérstökum verkefnum

Skoða ber sérstaklega samstarf við félagasamtök og stofnanir á sviði samfélagsþjónustu þar sem það á við.

Þjóðkirkjan veitir söfnuðum/prestaköllum aðstoð við að innleiða stefnu þjóðkirkjunnar í þessum málaflokki.

### **III. Kafli**

#### **Framtíðarsýn**

Lögð skal áhersla á að auka markvisst kærleiksþjónustu þjóðkirkjunnar í sóknum/prestaköllum landsins. Endurskoðun og efling kærleiksþjónustunnar er mikilvæg til að þjóðkirkjan geti sinnt hlutverki sínu sem kristin kirkja. Kærleiksverk er einn aðal lykillinn að því að viðhalda og mæta þörfum sóknarbarna fyrir kristna nærveru og kærleiksþjónustu í verki.

#### **Fylgiskjal með stefnu**

*Stefnumótun kærleiksþjónustu/diakoníu þjóðkirkjunnar 2021. Kynnt á kirkjuþingi í október 2021.*